

傷

寒

論

傷寒論卷第五

漢張仲景著

晉王叔和撰次

宋成無已註

錢塘張卿子叅

辨陽明脉證并治第八

問曰病有太陽陽明有正陽陽明有少陽陽明何謂也答曰太陽陽明者脾約是也

陽明胃也邪自太陽經傳之入腑者謂之太陽陽明經曰太陽病若吐若下若發汗後微煩小便數大便因鞭者與小承氣湯卽是太陽陽明脾約病

也

正陽陽明者胃家實是也

邪自陽明經傳入腑者謂之正陽陽明經曰陽明  
病脉遲澀汗出不惡寒其身必重短氣腹滿而喘  
有潮熱者外欲解可攻裏也手足濇濇然汗出者  
此大便已鞕也大承氣湯主之卽是正陽陽明胃  
家實也

少陽陽明者發汗利小便已胃中燥煩實大便難是  
也

邪自少陽經傳之入腑者謂之少陽陽明經曰傷寒脈弦細頭痛發熱者屬少陽少陽不可發汗發汗則譫語此屬胃卽是少陽陽明病也

陽明之爲病胃家實也

邪傳入胃熱毒留結則胃家爲實華陀曰熱毒入胃要須下去之不可留於胃中是知邪在陽明爲胃家實也

問曰何緣得陽明病答曰太陽病發汗若下若利小便此亡津液胃中乾燥因轉屬陽明不更衣內實大

便難者此名陽明也

木太陽病不解因汗利小便亡津液胃中乾燥太陽之邪入腑轉屬陽明古人登廁必更衣不更衣者通爲不大便不更衣則胃中物不得泄故爲內實胃無津液加之畜熱大便則難爲陽明裏實也問曰陽明病外證云何答曰身熱汗自出不惡寒反惡熱也

陽明病爲邪入腑也邪在表則身熱汗出而惡寒邪既入腑則表證已罷故不惡寒但身熱汗出而

惡熱也。

問曰病有得之一日不發熱而惡寒者何也答曰雖得之一日惡寒將自罷卽自汗出而惡熱也。

邪客在陽明當發熱而不惡寒今得之一日猶不發熱而惡寒者卽邪未全入腑尚帶表邪若表邪全入則更無惡寒必自汗出而惡熱也

問曰惡寒何故自罷答曰陽明居中土也萬物所歸無所復傳始雖惡寒二日自止此爲陽明病也

胃爲水穀之海王養四旁四旁有病皆能傳入於

胃入胃則更不復傳如太陽傳之入胃則更不傳陽明陽明病傳之入胃則更不傳少陽少陽病傳之入胃則更不傳三陰

本太陽初得病時發其汗汗先出不微因轉屬陽明也

傷寒傳經者則一日太陽二日陽明此太陽傳經故曰轉屬陽明

傷寒發熱無汗嘔不能食而反汗出濇濇然者是轉屬陽明也

傷寒發熱無汗，嘔不能食者，太陽受病也。若反汗出，穢穢然者，太陽之邪轉屬陽明也。經曰：陽明病，法多汗。

傷寒三日，陽明脈大。

傷寒三日，邪傳陽明之時。經曰：尺寸俱長者，陽明受病。當二三日發，陽明氣血俱多。又邪併於經，是以脈大。

傷寒脈浮而緩，手足自溫者，是爲繫在太陰。太陰者，身當發黃。若小便自利者，不能發黃。至七八日大便

鞭者爲陽明病也。

浮爲陽邪。緩爲脾脉。傷寒脉浮緩。太陰客熱邪在三陽。則手足熱。邪在三陰。則手足寒。今手足自溫。是知繫在太陰也。太陰土也。爲邪蒸之。則色見於外。當發身黃。小便自利者。熱不內畜。不能發黃。至七八日。大便鞭者。卽太陰之邪入腑。轉屬陽明也。傷寒轉繫陽明者。其人濇然微汗出也。

傷寒則無汗。陽明法多汗。此以傷寒邪轉繫陽明。故濇然微汗出。

陽明中風。口苦咽乾。腹滿微喘。發熱惡寒。脈浮而緊。若下之。則腹滿小便難也。

脈浮在表。緊爲裏實。陽明中風。口苦咽乾。腹滿微喘者。熱傳於裏也。發熱惡寒者。表仍未解也。若下之。裏邪雖去。表邪復入於裏。又亡津液。故使腹滿而小便難。

婁氏云。陽明宜下。先列在經與裏虛不宜下者於前。仲景慎重之意可見。

陽明病。若能食。名中風。不能食。名中寒。

陽明病以飲食別受風寒者以胃爲水穀之海風  
爲陽邪陽殺穀故中風者能食寒爲陰邪陰邪不  
殺穀故傷寒者不能食

陽明病若中寒不能食小便不利手足濇然汗出此  
欲作固瘕必大便初鞭後溏所以然者以胃中冷水  
穀不別故也

陽明中寒不能食者寒不殺穀也小便不利者津  
液不化也陽明病法多汗則周身汗出此手足濇  
然而汗出而身無汗者陽明中寒也固瘕者寒氣

結積也。胃中寒甚，欲留結而爲固瘕，則津液不得通行，而大便必鞭者，若汗出，小便不利者，爲實也。此以小便利不利，水穀不別，雖大便初鞭，後必溏也。陽明病欲食，小便反不利，大便自調，其人骨節疼痛，翁翁如有熱狀，奄然發狂，濊然汗出而解者，此水不勝穀氣，與汗共併，脈緊則愈。

陽病客熱初傳入胃，胃熱則消穀而欲食，陽明病熱爲實者，則小便當數，大便當鞭，今小便反不利，大便自調者，熱氣散漫，不爲實也。欲食則胃中穀

多內經曰食入於陰長氣於陽穀多則陽氣勝熱  
消津液則水少經曰水入於經其血乃成水少則  
陰血弱金匱要畧曰陰氣不通卽骨疼其人骨節  
疼者陰氣不足也熱甚於表者翁翁發熱熱甚於  
裏者蒸蒸發熱此熱氣散漫不專著於表裏故翁  
翁如有熱狀奄忽也忽然發狂者陰不勝陽也內  
經曰陰不勝其陽者則脉流薄疾并乃狂陽明蘊  
熱爲實者須下之愈熱氣散漫不爲實者必待汗  
出而愈故云濊然而汗出解也水穀之等者陰陽

氣平也。水不勝穀氣，是陰不勝陽也。汗出，則陽氣衰，脈緊，則陰氣生。陰陽氣平，兩無偏勝，曰愈。故云與汗共併，脈緊則愈。

陽明病欲解時，從申至戌上。

四月爲陽土旺於申酉戌，向旺時是爲欲解。

陽明病不能食，攻其熱必噦。所以然者，胃中虛冷，故也。以其人本虛，故攻其熱必噦。

不能食，胃中本寒，攻其熱復虛。其胃虛寒相搏，故令噦也。經曰：關脈弱，胃氣虛，有熱不可大攻之，熱

去則寒起此之謂也

陽明病脉遲食難用飽飽則微煩頭眩必小便難此欲作穀疸雖下之腹滿如故所以然者脉遲故也

陽明病脉遲則邪方入裏熱未爲實也食入於陰長氣於陽胃中有熱食難用飽飽則微煩而頭眩者穀氣與熱氣相搏也兩熱相合消搏津液必小便難利者不能發黃言熱得泄也小便不利則熱不得泄身必發黃疸黃也以其發於穀氣之熱故名穀疸熱實者下之則愈脉遲爲熱氣未實雖下

之腹滿亦不減也。經曰：脈遲尚未可攻。

張卿子云：此條同愈後損穀則愈症。由胃虛食鬱致熱，故曰穀疸成。註先云胃中有熱，食難用飽，則與脈遲故也句似失之。

陽明病法多汗，反無汗，其身如蟲行皮中狀者，此以久虛故也。

胃爲津液之府，氣虛津液少，病則反無汗，胃候身之肌肉，其身如蟲行皮中者，知胃氣久虛也。

陽明病反無汗而小便利，二三日嘔而欬，手足厥者，

必苦頭痛若不欬不嘔手足不厥者頭不痛

陽明病法多汗反無汗而小便利者陽明傷寒而寒氣內攻也至二三日嘔欬而支厥者寒邪發於外也必苦頭痛若不欬不嘔手足不厥者是寒邪但攻裏而不外發其頭亦不痛也

陽明病但頭眩不惡寒故能食而欬其人必嘔痛若不欬者咽不痛

陽明病身不重痛但頭眩而不惡寒者陽明中風而風氣內攻也經曰陽明病若能食名中風風邪

攻胃胃氣上逆則欬咽門者胃之系欬甚則咽傷故必咽痛若胃氣不逆則不欬其咽亦不痛也。

陽明病無汗小便不利心中懊憹者身必發黃。

陽明病無汗而小便不利者熱蘊於內而不得越心中懊憹者熱氣鬱蒸欲發於外而爲黃也。

陽明病被火額上微汗出小便不利者必發黃。

陽明病則爲內熱被火則火熱相合而甚若遍身汗出而小便利者熱得泄越不能發黃今額上微汗出而小便不利則熱不得越鬱蒸於胃必發黃。

也。

陽明病。脈浮而緊者。必潮熱。發作有時。但浮者。必盜汗出。

浮爲在經。緊者裏實。脈浮而緊者。表熱裏實也。必潮熱。發作有時。若脈但浮而不緊者。止是表熱也。必盜汗出。盜汗者。睡而汗出也。陽明病。裏熱者。自汗。表熱者。盜汗。

陽明病。口燥。但欲漱水。不欲嚥者。此必衄。

陽明之脈。起於鼻。絡於口。陽明裏熱。則渴欲飲水。

此口燥但欲漱水不欲嚥者是熱在經而裏無熱也。陽明氣血俱多經中熱甚迫血妄行必作衄也。陽明病本自汗出醫更重發汗病已差尚微煩不了了者此大便必鞭故也以亡津液胃中乾燥故令大便鞭當問其小便日幾行若木小便日三四行今日再行故知大便不久出今爲小便數少以津液當還入胃中故知不久必大便也。

先亡津液使大便鞭小便數少津液分別大便必自下也。

傷寒嘔多雖有陽明證不可攻之

嘔者熱在上焦未全入府故不可下

陽明病心下鞭滿者不可攻之攻之利遂不止者死  
利止者愈

陽明病腹滿者爲邪氣入府可下之心下鞭滿則  
邪氣尚淺未全入府不可便下之得利止者爲邪  
氣去正氣安正氣安則愈若因下利不止者爲正  
氣脫而死

陽明病面合赤色不可攻之必發熱色黃小便不利

也。

合通也。陽明病，面色通赤者，熱在經也，不可下之。下之，虛其胃氣，耗其津液，經中之熱乘虛入胃，必發熱，色黃，小便不利也。

陽明病，不吐不下，心煩者，可與調胃承氣湯。

吐後心煩，謂之內煩；下後心煩，謂之虛煩。今陽明病，不吐不下，心煩，則是胃有鬱熱也，與調胃承氣湯以下鬱熱。

陽明病，脈遲，雖汗出，不惡寒者，其身必重，短氣，腹滿。

而喘有潮熱者此外欲解可攻裏也手足濇然而汗  
出者此大便已鞭也大承氣湯主之若汗多微發熱  
惡寒者外未解也其熱不潮未可與承氣湯若腹大  
滿不通者可與小承氣湯微和胃氣勿令大泄下。

陽明病脈遲若汗出多微發熱惡寒者表未解也。  
若脈遲雖汗出而不惡寒者表證罷也。身重短氣  
腹滿而喘有潮熱者熱入府也四肢諸陽之本津  
液是爲熱烝之則周身汗出津液不足爲熱烝之。  
其手足濇然而汗出知大便已鞭也與大承氣湯

以下胃熱經曰潮熱者實也其熱不潮是熱未成實故不可便與大承氣湯雖有腹大滿不通之意亦不可與大承氣湯與小承氣湯微和胃氣

大承氣湯方

第七十一

大黃

四兩苦寒酒洗

厚朴

半斤苦溫炙去皮

枳實

五枚味苦寒炙

芒硝

三合味鹹寒

右四味以水一斗先煮二物取五升去滓內大黃煮取二升去滓內芒硝更上火微一兩沸分溫再服得下餘勿服

內經曰燥淫所勝以苦下之大黃枳實之苦以燥除熱又曰燥淫於內治以苦溫厚朴之苦下結燥又曰熱淫所勝治以鹹寒芒硝之鹹以攻蘊熱王海藏云厚朴去痞枳實泄滿芒硝軟堅大黃泄實必痞滿燥實四證全者方可用之

張卿子云乾陽亢極于上而曰有悔悔字卽陰承于下五行家所謂陰生于午坤象所謂順承天亢害承制之義與然此湯不曰制火不曰生陰曰承氣仲景真法天而爲方者也。

小承氣湯方

第七十四

大黃

四兩

厚朴

二兩炙

枳實

三枚大者炙

已上三味。以水四升。煮取一升二合。去滓。分溫二服。初服湯。當更衣。不爾者。盡飲之。若更衣者。勿服之。大熱結實者。與大承氣湯。小熱微結者。與小承氣湯。以熱不大甚。故於大承氣湯去芒硝。又以結不至堅。故亦減厚朴枳實也。

吳氏云。或問承氣湯。仲景有大小調胃之名。何也。傷寒傳變入裏。邪熱與精粕蘊而爲實。實則潮熱。

證諸手心濇濇汗出者此燥屎所爲也。如人壯大  
熱大實者宜大承氣湯下之。小熱小實者與小承  
氣湯下之。又熱結不堅滿者故減去厚朴枳實加  
甘草而和緩之。故曰調胃承氣也。若病大而以小  
承氣攻之則邪氣不伏病小而以大承氣攻之則  
過傷正氣且不及還可再攻過則不能復救可不  
慎哉。

陽明病潮熱大便微鞭者可與大承氣湯不鞭者不  
與之。若不大便六七日恐有燥屎欲知之法少與小

承氣湯。湯入腹中。轉失氣者。此有燥屎。乃可攻之。若不轉失氣者。此但初頭鞭。後心澹。不可攻之。攻之必脹滿。不能食也。欲飲水者。與水則噦。其後發熱者。必大便復鞭而少也。以小承氣湯和之。不轉失氣者。慎不可攻也。

潮熱者。實得大便。微鞭者。便可攻之。若便不鞭者。則熱未成實。微有潮熱。亦未可攻。若不大便六七日。恐有燥屎。當先與小承氣湯。漬之。如有燥屎。小承氣湯藥勢緩。不能宣泄。必轉氣下失。若不轉失。

氣是胃中無燥屎。但腸間水鞭而止。初頭鞭後必  
澀。攻之則虛。其胃氣致腹脹滿不能食也。胃中乾  
燥則欲飲水。水入胃中。虛寒相搏。氣逆則噦。其後  
即發熱者。則熱氣乘虛還復聚於胃中。胃燥得熱  
必大便復鞭。而少與小承氣湯微利以和之。故重  
云不轉失氣不可攻。慎之至也。

夫實則譫語。虛則鄭聲。鄭聲重語也。

內經曰。邪氣盛則實。精氣奪則虛。譫語由邪氣盛  
而神識昏也。鄭聲由精氣奪而神識不全也。譫語者

鄭聲四時之音而聲不全也

言語不次也。鄭聲者，鄭音不正也。論語云：惡鄭聲之亂雅樂。又云：放鄭聲，遠佞人。鄭聲淫，佞人殆。言鄭聲不正也。今新差氣虛，人聲轉者是，所謂重語者也。若聲重亦聲轉之。

王字泰云：譌語者，謂亂言無次數，數更端也。鄭聲者，謂鄭重頻煩也。只將一句舊言，重疊頻言之，終日殷勤，不換他聲也。蓋神有餘，則能機變而亂語，數數更端，神不足，則無機變而只守一聲也。成氏謂鄭衛之聲非是。

樊氏云。譫語者。氣虛獨語也。素問云。脫陽者見鬼。  
余川參耆溫補。活者數百十人。不可集以譫語爲  
實。

直視譫語。喘滿者死。下利者亦死。

直視譫語。邪勝也。喘滿爲氣上脫。下利爲氣下脫。  
是皆主死。

發汗多。若重發汗者。亡其陽。譫語。脉短者死。脉自和  
者不死。

亡陽。胃燥。譫語者。脉短。津液已絕。不可復治。脉自

和爲正氣未衰而猶可生也。

傷寒若吐若下後不解不大便五六日上至十餘日。日晡所發潮熱不惡寒獨語如見鬼狀若劇者發則不識人循衣摸牀惕而不安微喘直視脈弦者生。清者死微者但發熱識語者大承氣湯主之。若一服利止後服。

若吐若下皆傷胃氣不大便五六日上至十餘日者亡津液胃氣虛邪熱內結也。陽明王於申酉戌日晡所發潮熱者陽明熱甚也不惡寒者表證

罷也。獨語如見鬼狀者。陽明內實也。以爲熱氣在  
餘。若劇者是熱氣甚大也。熱大甚於內。昏冒正氣。  
使不識人。至於循衣摸牀。惕而不安。微喘直視。傷  
寒陽勝而陰絕者死。陰勝而陽絕者死。熱劇者爲  
陽勝。脈弦爲陰有餘。瀝爲陰不足。陽熱雖劇。脈弦。  
知陰未絕而猶可生。脈瀝則絕陰。故不可治。其邪  
熱微而未至於劇者。但發熱譫語。可與大承氣湯。  
以下胃中熱。經曰。凡服下藥。中病卽止。不必盡劑。  
此以熱未劇。故云。若一服利。則止後服。

陽明病其人多汗以津液外出胃中燥大便必鞕  
則譫語小承氣湯主之若一服譫語止更莫復服  
亡津液胃燥大便鞕而譫語雖無大熱內結亦須  
與小承氣湯和其胃氣得一服譫語止則胃燥以  
潤更莫復與承氣湯以水無實熱故也

陽明病譫語發潮熱脉滑而疾者小承氣湯主之因  
與承氣湯一升腹中轉失氣者更服一升若不轉失  
氣勿更與之明日不大便脉反微澀者裏虛也爲難  
治不可更與承氣湯也

陽明病譫語發潮熱若脉沉實者內實者也則下  
下若脉滑疾爲裏熱未實則未可下先與小承氣  
湯和之湯入腹中得失氣者中有燥屎可更與小  
承氣湯一升以除之若不轉失氣者是無燥屎不  
可更與小承氣湯至明日邪氣傳時脉得沉實緊  
牢之類是裏實也反得微澁者裏氣大虛也若大  
便利後脉微澁者止爲裏虛而猶可此不曾大便  
脉反微澁是正氣內衰爲邪氣所勝故云難治  
陽明病譫語有潮熱反不能食者胃中必有燥屎五

六枚也若能食者但鞭爾宜大承氣湯下之。

譫語潮熱爲胃熱常消穀引食反不能食者胃中有燥屎而胃中實也若能食者胃中虛熱雖鞭不得爲有燥屎雜病虛爲不欲食實爲欲食傷寒則胃實熱甚者不能食胃中虛熱甚者能食與雜病爲異也大承氣湯以下燥屎逐結熱。

陽明病下血譫語者此爲熱入血室但頭汗出者刺期門隨其實而瀉之瀝然汗出即愈。

陽明病熱入血室迫血下行使下血譫語陽明病

法多汗以奪血者無汗故但頭汗出也刺期門以散血室之熱也隨其實而瀉之以除陽明之邪熱散邪除熱榮衛得通津液得復濺然汗出而解王三陽云此男子亦有之不比太陽少陽證也熱邪入胸中故迫血下行亦刺期門者期門肝之募肝主血刺之以瀉實也

汗出譫語者以有燥屎在胃中此爲風也須下之是經乃可下之下之若早語言必亂以表虛裏實故也下之則愈宜大承氣湯

胃中有燥屎則譫語以汗出爲表未罷故云風也燥屎在胃則當下以表未和則未可下須過太陽經無表證乃可下之若下之早燥屎雖除則表邪乘虛復陷於裏爲表虛裏實胃虛熱甚語言必亂與大承氣湯却下胃中邪熱則止

王三陽云陽明多汗況有譫語故又當下但風家有用汗恐汗出則表未罷故須過經可下若早燥屎雖除表邪乘虛復陷又將爲表虛裏實矣下之則愈二句又申明乃可下之一句耳

傷寒四五日，脈沉而喘滿，沉爲在裏，而反發其汗，津液越出，大便爲難，表虛裏實，久則譫語。

邪氣入內之時，得脈沉而喘滿，裏證具也，則當下之，反發其汗，令津液越出，胃中乾燥，大便必難，久則屎燥，胃實，必發譫語。

三陽合病，腹滿身重，難以轉側，口不仁而面垢，譫語遺尿，發汗則譫語下之，則額上生汗，手足逆冷，若自汗出者，白虎湯主之。

腹滿身重，難以反側，口不仁，譫語者，陽明也，鍼經

曰少陽病甚則面微塵此而垢者少陽也遺尿者  
太陽也三者以陽明證多故出陽明篇中三陽合  
病爲表裏有邪若發汗攻表則燥熱益甚必愈譫  
語若下之攻裏表熱乘虛內陷必額上汗出手足  
逆冷其自汗出者三陽經熱甚也內經曰熱則腠  
理開榮衛通汗大泄與白虎湯以解內外之熱  
二陽併病太陽證罷但發潮熱手足漿漿汗出大便  
難而譫語者下之則愈宜大承氣湯

本太陽病併於陽明名曰併病太陽證罷是無表

證但發潮熱是熱併陽明。一身汗出爲熱越。今手足絳絳汗出是熱聚於胃也。必大便難而譫語。經曰手足絳然而汗出者必大便已鞭也。與大承氣湯以下胃中實熱。

陽明病脉浮而緊咽燥口苦腹滿而喘發熱汗出不惡寒反惡熱身重若發汗則燥心憤憤反譫語若加燒鍼必怵惕煩躁不得眠若下之則胃中空虛客氣動脇心中懊憹舌上胎者梔子豉湯主之。

脉浮發熱爲邪在表咽燥口苦爲熱在經脉緊腹

滿而喘汗出不惡寒反惡熱身重爲邪在裏此表裏俱有邪猶當雙解之若發汗攻表表熱雖除而內熱益甚故燥而憤憤反譫語憤憤者心亂經曰榮氣微者加燒鍼則血不行更益熱而躁煩此表裏有熱若加燒鍼則損動陰氣故怵惕煩躁不得眠也若下之裏熱雖去則胃中空虛裏中客邪之氣乘虛陷於上焦煩動於胸使心中懊憹而不了也舌上胎黃者熱氣客於胃中舌上胎白知熱氣客於胸中與梔子豉湯以吐胸中之邪

傷寒論卷三  
三  
婁氏云梔子豉湯專指下後心中懊憹者設。

若渴欲飲水口乾舌燥者白虎加人參湯主之。

若下後邪熱客於上焦者爲虛煩此下後邪熱不  
客於上焦而客於中焦者是爲乾燥煩渴與白虎  
加人參湯散熱潤燥。

若脈浮發熱渴欲飲水小便不利者猪苓湯主之。  
此下後客熱客於下焦者也邪氣自表入裏客於  
下焦三焦俱帶熱也脈浮發熱者上焦熱也渴欲  
飲水者中焦熱也小便不利者邪客下焦津液不

得下通也。與猪苓湯利小便以瀉下焦之熱也。  
張兼善云：脈浮發熱，上焦也；渴欲飲水，中焦也；小便不利，下焦也。津液不得下通也。但邪熱客於下焦，則津液亦不得上升，故亦有作渴者。瀉下焦之熱，熱不得阻塞，中焦肺與膀胱津液流通而病自愈矣。

猪苓湯方

第七十五

猪苓

去皮，味苦，平。

茯苓

味苦，平。

北膠

味苦，平。

滑石

碎，味苦，寒。

澤瀉

味苦，寒，各一兩。

右五味以水四升。先煮四味取二升去滓。內下阿膠。烱消溫服七合。日三服。

其甚而反淡淡味滲泄爲陽。猪苓茯苓之其以行。小便鹹味湧泄爲陰。澤瀉之鹹以泄伏水。滑利寒。阿膠滑石之滑以利水道。

陽明病汗出多而渴者不可與猪苓湯。以汗多。胃中燥。猪苓湯復利其小便故也。

鍼經曰水穀入於口。輸於腸胃。其液別爲五。天寒衣薄則爲溺。大熱衣厚則爲汗。是汗溺一液也。汗

多爲津液外泄。胃中乾燥。故不可與猪苓湯利小便也。

脈浮而遲。表熱裏寒。下利清穀者。四逆湯主之。

浮爲表熱。遲爲裏寒。下利清穀者。裏寒甚也。與四逆湯。溫裏散寒。

若胃中虛冷。不能食者。飲水則嘔。

嘔者。欬逆是也。千金曰。欬逆者。嘔逆之名。胃中虛冷。得水則水寒相搏。胃氣逆而嘔。

脈浮發熱。口乾鼻燥。能食者。則飢。

脈浮發熱，口乾鼻燥者，熱在經也。能食者，裏和也。熱甚於經，迫血爲衄，胃中虛冷，陰勝也。水入於經，其血乃成。飲水者，助陰氣，逆爲嘔，發熱口乾，陽勝也。食入於陰，長氣於陽，能食者，助陽血，妄爲衄，二者偏陰偏陽之疾也。

王三陽云：上二條另是中陰腑之疾，此條已下又是陽經傳來之疾也。

陽明病下之，其外有熱，手足溫，不結胸，心中懊憹，飢不能食，但頭汗出者，梔子豉湯主之。

表未罷而下者。應邪熱內陷也。熱內陷者。則外熱而無手足溫。今外有熱而手足溫者。熱雖內陷。然而不深。故不作結胸也。心中懊憹。饑不能食者。熱客胸中。爲虛煩也。然自胸中蒸蒸於上。故但頭汗出而身無汗。與梔子豉湯以吐胸中之虛煩。

陽明病。發潮熱。大便秘。小便自可。胸脇滿不去者。小柴胡湯主之。

陽明病。潮熱。爲胃實。大便秘。而小便數。今大便秘。小便自可。則胃熱未實。而水穀不別也。大便秘者。

應氣降而胸脇滿去。今反不去者。邪氣猶在半表半裏之間。與小柴胡湯以去表裏之邪。

吳氏云。邪在半表半裏。雖潮熱。不得爲裏大實。故仍以半表半裏治之。何也。便澹脇滿故也。

陽明病。脇下鞅滿。不大便而嘔。舌上白胎者。可與小柴胡湯。上焦得通。津液得下。胃氣因和。身濺然而汗出解也。

陽明病。腹滿。不大便。舌上胎黃者。爲邪熱入府。可下。若脇下鞅滿。雖不大便而嘔。舌上白胎者。爲邪

未入府。在表裏之間。與小柴胡湯以和解之。上焦得通。則嘔止。津液得下。則胃氣因和。汗出而解。

吳氏云。且有脇下鞭滿。在柴胡證猶未除也。陽明中風。脈弦浮大。而短氣。腹都滿。脇下及心痛。又按之氣不通。鼻乾。不得汗。嗜卧。一身及面目悉黃。小便難。有潮熱。時時噦。耳前後腫。刺之小差。外不解。病過十日。脈續浮者。與小柴胡湯。脈但浮。無餘證者。與麻黃湯。若不尿。腹滿加噦者。不治。

浮大爲陽風在表也。弦則爲陰風在裏也。短氣腹

滿脇下及心痛風熱壅於腹中而不通也若寒客  
於內而痛者按之則寒氣散而痛止此以風熱內  
壅故雖久按而氣亦不通陽明病鼻乾不得卧自  
汗出者邪在表也此鼻乾不得汗而嗜卧者風熱  
內攻不干表也一身而目悉黃小便難有潮熱時  
時譫者風熱攻於胃也陽明之脉出大迎循頰車  
上耳前過客主人熱勝則腫此風熱在經故耳前  
後腫刺之經氣通腫則小差如此者外證罷則可  
攻若外證不解雖過十日脉續浮者邪氣猶在半

表半裏與小柴胡湯以和解之。若其脉但浮而不弦大，無諸裏證者，是邪但在表也，可與麻黃湯以發其汗。若不尿、腹滿、加噦者，關格之疾也，故云不治。難經曰：關格者，不得盡其命而死。

陽明病自汗出，若發汗，小便自利者，此爲津液內竭，雖鞭不可攻之。當須自欲大便，宜蜜煎導而通之。若土瓜根及與大猪膽汁皆可爲導。

津液內竭，腸胃乾燥，大便因硬，此非結熱，故不可攻。宜以藥外治而導引之。

蜜煎導方

第七十六

蜜七合。一味內銅器中。微火煎之。稍凝似飴狀。攤之。勿令焦著。欲可丸餅。手捻作挺。令頭銳。大如指。長二寸許。當熱時急作。冷則硬。以內穀道中。以手急抱。欲大便時。乃去之。

豬膽汁方

第七十七

大豬膽一枚。瀉汁和醋少許。以灌穀道中。如一食頃。當大便出。

陽明病。脈遲。汗出多。微惡寒者。表未解也。可發汗。宜

桂枝湯。

陽明病，脈遲，汗出多，當責邪在裏，以微惡寒，知表未解，與桂枝湯和表。

陽明病，脈浮，無汗而喘者，發汗則愈，宜麻黃湯。

陽明傷寒，表實，脈浮，無汗而喘也，與麻黃湯以發汗。

陽明病，發熱，汗出，此爲熱越，不能發黃也，但頭汗出，身無汗，劑頸而還，小便不利，渴引水漿者，此爲瘧熱在裏，身必發黃，茵陳湯主之。

但頭汗出身無汗劑頸而還者熱不得越也小便不利渴飲水漿者熱甚於胃津液內竭也胃爲土而色黃胃爲熱蒸則色奪於外必發黃也與茵陳湯逐熱退黃。

王三陽云此與頭汗出小便不通難治條當細辨之。

茵陳蒿湯方

第七十八

茵陳蒿

六兩。味苦微寒。

梔子

十四枚。擘。苦寒。

大黃

二兩。去皮。苦寒。

右三味以水一斗先煮茵陳減六升內二味煮取三

升去滓分溫三服。小便當利。尿如皂角汁狀。色正赤。一宿復減。黃從小便去也。

小熱之氣涼以和之。大熱之氣寒以取之。茵陳梔子之苦寒以逐胃燥。宜下必以苦宜補必以酸。大黃之苦寒以下瘀熱。

陽明證其人喜忘者必有畜血。所以然者本有久瘀血。故令喜忘。屎雖鞅大便反易其色必黑。宜抵當湯下之。

內經曰血并於下。亂而喜忘。此下本有久瘀血所

以喜忘也。津液少。大便鞭。以畜血在內。屎雖鞭。大便反易。其色黑也。與抵當湯以下瘀血。

王海藏云。初便褐色者重。再便深褐色者愈重。三便黑色者爲九重色。變者以其火燥也。如羊血在。日色中須更變褐色。久則漸變而爲黑色。卽此意也。

陽明病下之心。中懊憹而煩。胃中有燥屎者可攻。腹微滿。初頭鞭。後必澹。不可攻之。若有燥屎者。宜大承氣湯。

下後心中懊憹而煩者虛煩也。當與梔子豉湯。若胃中有燥屎者非虛煩也。可與大承氣湯下之。其腹微滿初鞭後澀是無燥屎。此熱不在胃而在上也。故不可攻。

病人不大便五六日。繞臍痛煩躁發作有時者。此有燥屎。故使不大便也。

不大便五六日者。則大便必結爲燥屎也。胃中燥實氣不得下通。故繞臍痛煩躁發作有時也。

病人煩熱汗出則解。又如瘧狀。日晡所發熱者。屬陽

明也。脈實者宜下之。脈浮虛者宜發汗下之。與大承氣湯發汗宜桂枝湯。

雖得陽明證未可便爲裏實。審看脈候以別內外。其脈實者熱已入府爲實可與大承氣湯下之。其脈浮虛者是熱未入府猶在表也可與桂枝湯發汗則愈。

大下後六七日不大便煩不解腹滿痛者此有燥屎也。所以然者本有宿食故也。宜大承氣湯。

大下之後則胃弱不能消穀至六七日不大便則

宿食已結不消故使煩熱不解而腹滿痛是知有燥屎也與大承氣湯以下除之。

婁氏云此大下之後又下之也反用大承氣者以津液漸竭故也須審虛實用之不如梔子枳實穩當。

病人小便不利大便乍難乍易時有微熱喘冒不能卧者有燥屎也宜大承氣湯。

小便利則大便鞭此以有燥屎故小便不利而大便乍難乍易胃熱者發熱喘冒無時及嗜卧也此

燥屎在胃故時有微熱喘胃不得卧也與大承氣湯以下燥屎

王三陽云此證不宜妄動必以手按之大便有鞭塊喘目不能卧方可攻之何也乍難乍易故也

食穀欲嘔者屬陽明也吳茱萸湯主之得湯反劇者屬上焦也

上焦主內胃爲之市食穀欲嘔者胃不受也與吳茱萸湯以溫胃氣得湯反劇者上焦不內也以治上焦法治之

吳茱萸湯方

第七十九

吳茱萸

洗

人參

三兩

生薑

六兩

大棗

十二枚

右四味以水七升煮取二升去滓溫服七合日三服

內經曰寒淫於內治以甘熱佐以苦辛吳茱萸生

薑之辛以溫胃人參大棗之甘以緩脾

婁氏云得湯反劇者火也當用生薑黃連治之

太陽病寸緩關浮尺弱其人發熱汗出復惡寒不嘔

但心下痞者此以醫下之也如其不下者病人不嘔

寒而渴者。此轉屬陽明也。小便數者。大便必鞭。不更  
衣十日無所苦也。渴欲飲水。少少與之。但以法救之。  
渴者宜五苓散。

太陽症。脈陽浮陰弱。爲邪在表。今寸緩關浮。尺弱。  
邪氣漸傳裏。則發熱汗出。復惡寒者。表未解也。傳  
經之邪入裏。裏不和者必嘔。此不嘔。但心下痞者。  
醫下之。是邪氣留於心下也。如其不下者。必漸不  
惡寒而渴。太陽之邪。轉屬陽明也。若吐若下。若發  
汗後。小便數。大便鞭者。當與小承氣湯和之。此不

因吐下發汗後小便數大便鞭若是無精實雖不更衣十日無所苦也。候津液還入胃中小便數少大便必自出也。渴欲飲水者少少與之以潤胃氣。但審邪氣所在以法救之。如渴不止與五苓散是也。

張兼善云。十日不更衣而不用攻伐何也。曰。此非結熱。乃津液不足。夫不便者。若有潮熱數語可下之證者。然後可以攻之。其不大便而無諸下證者。此津液不足。當須審慎。勿以日數久而輒爲攻下。

也。

王三陽云此處五苓散難用不然經文渴字上當有缺文也

脉陽微而汗出少者爲自和也汗出多者爲太過。

脉陽微者邪氣少汗出少者爲適當故自和汗出多者反損正氣是汗出太過也。

陽脉實因發其汗出多者亦爲太過太過爲陽絕於裏亡津液大便因鞭也。

陽脉實者表熱甚也因發汗熱乘虛蒸津液外泄。

致汗出太過。汗出多者亡其陽。陽絕於裏。腸胃乾燥。大便因鞭也。

脈浮而芤。浮爲陽。芤爲陰。浮芤相搏。胃氣生熱。其陽則絕。

浮芤相搏。陰陽不諧。胃氣獨治。鬱而生熱。消燦津液。其陽爲絕。

跌陽脈浮而濇。浮則胃氣強。濇則小便數。浮濇相搏。大便則難。其脾爲約。麻仁丸主之。

跌陽者。脾胃之脈。診浮爲陽。知胃氣強。濇爲陰。知

脾爲約。約者。儉約之約。又約束之約。內經曰。飲入於胃。游溢精氣。上輸於脾。脾氣散精。上歸於肺。通調水道。下輸於膀胱。水精四布。五經並行。是脾主爲胃行其津液者也。今胃強脾弱。約束津液。不得四布。但輸膀胱。致小便數。大便難。與脾約丸通腸潤燥。

麻仁丸方

第八十

麻子仁

二升。味甘平。

芍藥

半升。味酸平。

大黃

一斤。土皮。味苦寒。

厚朴

一斤。炙。去皮。味苦寒。

枳實

半斤。炙。味苦寒。

杏仁

一斤。去皮尖。熬。別作脂。非溫。

右六味爲末。煉蜜爲丸。桐子大。飲服十丸。日三服。漸加以和爲度。

內經曰。脾欲緩。急食甘以緩之。麻子杏仁之甘。緩脾而潤燥。津液不足以酸收之。芍藥之酸。以斂津液。腸燥胃強。以苦泄之。枳實厚朴大黃之苦。下燥結而泄胃強也。

太陽病。三日。發汗不解。蒸蒸發熱者。屬胃也。調胃承氣湯注之。

蒸蒸者。如熱薰蒸。言其熱也。太陽病三日。發汗不  
解。則表邪已罷。蒸蒸發熱。胃熱爲甚。與調胃承氣  
湯下胃熱。

傷寒吐後。腹脹滿者。與調胃承氣湯。

內經曰。諸脹腹大皆屬於熱。熱在上焦則吐。吐後  
不解。復腹脹滿者。邪熱入胃也。與調胃承氣湯下  
其胃熱。

太陽病。若吐。若下。若發汗。微煩。小便數。大便因鞭者。  
與小承氣湯和之愈。

吐下發汗皆損津液。表邪乘虛傳裏。大煩者邪在表也。微煩者邪入裏也。小便數大便因鞭者其脾爲約也。小承氣湯和之愈。

得病二三日。脈弱無太陽柴胡證。煩燥心下鞭。至四五日。雖能食。以小承氣湯少少與微和之。令小安。至六日。與承氣湯一升。若不大便。六七日。小便少者。雖不能食。但初頭鞭後必溏。未定成鞭。攻之必溏。須小便利。屎定鞭。乃可攻之。宜大承氣湯。

針經曰。脈軟者病將下。弱爲陰脈。當責邪在裏。得

病二三日，脉弱。是日數雖淺而邪氣已入裏也。無  
太陽證爲表證已罷，無柴胡證爲無半表半裏之  
證。煩燥心下鞭者，邪氣內甚也。胃實熱甚，則不能  
食。胃虛熱甚，甚至四五日，雖能食，亦當與小承氣湯。  
微和之。至六日，則熱甚，與大承氣湯一升。若不大  
便六七日，小便多者，爲津液內竭。大便必鞭，則可  
下之。小便少者，則胃中水穀不別。必初鞭後澀，雖  
不能食，爲胃實。以小承氣湯，則未定成鞭，亦不可攻。  
須小便利，尿定鞭，乃可攻之。

傷寒六七日。目中不了了。睛不和。無表裏證。大便難。身微熱者。此爲實也。急下之。宜大承氣湯。

內經曰。諸脈者皆屬於目。傷寒六七日。邪氣入裏之時。目中不了了。睛不和者。邪熱內甚。上熏於目也。無表裏證。大便難者。裏實也。身大熱者。表熱也。身微熱者。裏熱也。針經曰。熱病目不明。熱不已者死。此目中不了了。睛不和。則證近危惡也。須急與大承氣湯下之。

陽明發熱。汗多者。急下之。宜大承氣湯。

邪熱入府外發熱汗多者熱迫津液將竭急與大承氣湯以下其府熱。

發汗不解腹滿痛者急下之宜大承氣湯。

發汗不解邪熱傳入府而成腹滿痛者傳之迅也是須急下之。

腹滿不減減不足言當下之宜大承氣湯。

腹滿不減邪氣實也經曰大滿大實可除下之大承氣湯下其滿實若腹滿時減非內實也則不可下金匱要畧曰腹滿時減復如故此爲寒當與

溫藥是減不足言也

陽明少陽合病必下利其脉不負者順也負者失也互相尅賊名爲負也脉滑而數者有宿食也當下之宜大承氣湯

陽明土少陽木二經合病氣不相和則必下利少陽脉不勝陽明不負是不相尅爲順也若少陽脉勝陽明脉負者是鬼賊相尅爲正氣失也脉經曰脉滑者爲病食也又曰滑數則胃氣實下利者脉當微厥冷脉滑數知胃有宿食與大承氣湯以下

除之。

病人無表裏證發熱七八日雖脉浮數者可下之。假令已下脉數不解合熱則消穀善饑至六七日不大便者有瘀血宜抵當湯。

七八日邪入府之時病人無表裏證但發熱雖脉浮數亦可與大承氣湯下之。浮爲熱客於氣數爲熱客於血下之邪熱去而浮數之脉俱當解。若下後數脉去而脉但浮則是榮血間熱併於衛氣也。當爲邪氣獨留心中則饑邪熱不殺穀潮熱發

渴之證。此下之後。浮脉去而數不解。則是衛氣間  
熱。合於榮血間也。熱氣合併迫血下行。胃虛協熱。  
消穀善饑。血至下焦。若大便利者。下血乃愈。若六  
七日不大便。則血不得行。畜積於下。爲瘀血。與抵  
當湯以下去之。

張兼善云。攻下之法。須外無表證。裏有下證。然後  
可攻。上言無表裏證。况脉更浮數。何故言可下之。  
曰。此非風寒之所病。是由內傷而致然也。若外不  
惡寒。裏無譫語。但七八日發熱。消燥津液。乃陽盛。

陰虛之時苟不攻之其熱不已而變生焉故不待  
沉實而攻之

許叔微云凡傷寒當下之證皆從太陽陽明在經  
之邪而入于府故下之今不言陽明病而止云病  
人無表裏證此非自表之裏而病也但爲可下故  
獨入陽明篇中

若脉數不解而下不止必協熱而便膿血也

下後脉數不解而不大便者是熱不得泄畜血於  
下爲瘀血也若下後脉數不解而下利不止者爲

熱得下泄，迫血下行，必便膿血。

傷寒發汗已，身目爲黃，所以然者，以寒濕在裏不解故也。以爲不可下也。於寒濕中求之。

金匱要畧曰：黃家所起，從濕得之。汗出熱去，則不能發黃。發汗已，身目爲黃者，風氣去，濕氣在也。脾惡濕，濕氣內著，脾色外著者，身目爲黃。若瘀血在裏發黃者，則可下。此以寒濕在裏，故不可下。當從寒濕法治之。

傷寒七八日，身黃如橘，子色，小便不利，腹微滿者，因

陳蒿湯主之

當熱甚之時身黃如橘子色是熱毒發泄於外。內經曰膀胱者津液藏焉氣化則能出小便不利小便滿者熱氣甚於外而津液不得下行也與茵陳湯利小便退黃逐熱

王海藏云熏黃濕病也一身盡痛橘子黃黃病也一身不痛

唐不巖云熏黃陰黃也橘子黃陽黃也

傷寒身黃發熱者梔子檳皮湯主之

傷寒身黃胃有瘀熱當須下去之此以發熱爲熱未實與梔子檨皮湯解散之

梔子檨皮湯方

第八十一

梔子

一十五箇  
味苦寒

甘草

一兩  
味

黃檨

二兩

右三味以水四升煮取一升半去滓分溫再服

傷寒瘀熱在裏身必發黃麻黃連軹赤小豆湯主之

濕熱相交民多病癰瘡黃也傷寒爲寒濕在表發

黃爲瘀熱在裏與麻黃連軹赤小豆湯除熱散濕

麻黃連軹赤小豆湯方

第八十二

麻黃

二兩去節  
味其溫

赤小豆

一升  
味其平

連軹

二兩連根也  
苦寒

杏仁

四十個去  
皮尖其溫

大棗

十二枚  
味其溫

生梓白皮

一升  
苦寒

生薑

二兩切  
味辛溫

甘草

一兩炙  
味其平

已上八味以潦水一斗先煮麻黃再沸去上沫內諸藥煮取三升分溫三服半日則盡

內經曰濕上甚而熱治以甘溫佐以甘平以汗爲故正此之謂也又煎用潦水者亦取具水味薄則不助濕氣

婁氏云梔子檉皮湯麻黃連軹赤小豆湯治身黃

小便利而身不疼者。海藏所謂乾黃是也。桂枝附子湯去桂加白朮湯治身黃小便利而一身盡痛者。活人所謂中濕是也。

辨少陽病脉證并治第九

少陽之病。口苦咽乾目眩也。

足少陽膽經也。內經曰有病口苦者。名曰膽痺。甲乙經曰膽者中精之府。五藏取決於膽。咽爲之使。少陽之脉起於目銳眦。少陽受邪。故口苦咽乾目眩。

少陽中風。兩耳無所聞。目赤。胸中滿而煩者。不可吐下。吐下則悸而驚。

少陽之脈起於目眥。走於耳中。其支者下胸中。貫膈。風傷氣壅則爲熱。少陽中風。氣壅而熱。故耳聾目赤。胸滿而煩。邪在少陽。爲半表半裏。以吐除煩。吐則傷氣。氣虛者悸。以下除滿。下則亡血。血虛者驚。

或云。少陽病。耳聾。目赤。胸滿而煩。爲中風。口苦。咽乾。目眩。爲傷寒。

王宇泰云。誤吐氣虛者悸。誤下血虛者驚。

傷寒。脉弦細。頭痛。發熱者。屬少陽。少陽不可發汗。發汗則譫語。此屬胃。胃和則愈。胃不和則煩而悸。

經曰。三部俱弦者。少陽受病。脉細者。邪漸傳裏。雖頭痛發熱。爲表未解。以邪客少陽。爲半在表。半在裏。則不可發汗。發汗亡津液。胃中乾燥。少陽之邪。因傳入胃。必發譫語。當與調胃承氣湯下之。胃和則愈。不下則胃爲少陽木邪干之。故煩而悸。

王宇泰云。凡頭痛俱爲在表。惟此頭痛爲少陽者。

何也。以脉弦細。可汗不可汗。當以此爲法。

王海藏云。少陽半表裏。用小柴胡。名三禁湯。然亦須辨表裏症孰多。假令頭痛往來寒熱。脉浮。但有一。卽爲表也。口失滋味而渴。脇下滿。手足溫。腹中不和。大小便或秘而不通。或泄而不調。但有其一。卽爲裏也。如無上下表裏症。餘皆虛熱也。是病在其中矣。

本太陽病不解。轉入少陽者。脇下鞭滿。乾嘔。不能食。往來寒熱。尚未吐下。脉沉緊者。與小柴胡湯。

太陽轉入少陽是表邪入於裏脇下鞅滿不能食  
往來寒熱者邪在半表半裏之間若已經吐下脉  
沉緊者邪氣入府爲裏實尙未可吐下而脉沉緊  
爲傳裏雖深未全入府外猶未解也與小柴胡湯  
以和解之

若已吐下發汗溫鍼譏語柴胡湯證罷此爲壞病知  
犯何逆以法治之

少陽之邪在表裏之間若妄吐下發汗溫鍼損耗  
津液胃中乾燥木邪干胃必發譏語若柴胡證不

罷者則不爲逆。柴胡證罷者，壞病也。詳其因何治之，逆以法救之。

王宇泰云：救壞病，助榮衛，生津液，桂枝湯求之。

三陽合病，脈浮大，上關上，但欲眠睡，目合則汗。

關脈以候少陽之氣，太陽之脈浮。陽明之脈大，脈浮大上關上，知三陽合病。臍熱則腫，少陰病但欲眠睡，目合則無汗，以陰不得有汗，但欲眠睡，目合則汗，知三陽合病，臍有熱也。

得寒六七日，無大熱，其人躁煩者，此爲陽去入陰故也。

表爲陽裏爲陰邪在表則外有熱六七日邪氣入裏之時外無大熱內有躁煩者表邪傳裏也故曰陽去入陰

又云所謂煩躁者謂先煩漸至躁也所謂躁煩者謂先發躁而適遲復煩也蓋內熱曰煩謂心中鬱煩也外熱曰躁謂氣外熱躁也內熱爲有根之火故但煩不躁及先煩後躁者皆可治外熱爲無根之火故但躁不煩及先躁後煩者皆不可治

傷寒三日三陽爲盡三陰當受邪其人反能食而不

嘔。此爲三陰不受邪也。

傷寒四日。表邪傳裏。裏不和。則不能食而嘔。今反能食而不嘔。是邪不傳陰。但在陽也。

傷寒三日。少陽脈小者。欲已也。

內經曰。大則邪至。小則平。傷寒三日。邪傳少陽。脈當弦緊。今脈小者。邪氣微而欲已也。

少陽病欲解時。從寅至辰上。

內經曰。陽中之少陽。通於春氣。寅卯辰。少陽木王之時。